

Il nagin

Fadrina Hoffmann

Il local è fullanà cun glied giuvna che bai-va, balla e discorra. L'aria è stitga, la glisch è debla ed il fim furma ina tschajerina. Ina giuvna givla cura ch'in tip l'auza en l'aria. El la bitta sur sia spatla e cloma dad aut: «Tgi vul in satg tartuffels? Mo dus francs il kilo!» La rassa curta da la giuvna glischna ensi e mussa las tgluttas radundas ed in tochet dal tanga nair. «Jau la prendess immediat», pensa Leo e baiva in sitg da ses cocktail. Atgnamain n'ha el gnanc gugent questa triacca verda, ma d'empustar in té da menta fiss memia penibel. «Ice mint» tuna almain in pau cool. «Sco sch'insatgi remartgass tge che jau baiv ...», di Leo plain spretsch mo per sasez. El sesa sulet en in chantun da la bar. Davent da qua ha'l ina buna vista. Il palc da ballar è entamez il local. Là ballan bleras giuvnas mez nivas, duas sa bitschan, guardan lura vers ina gruppa da giuvens e rin. Leo na po betg smetter da guardar sin quellus duas. I plascha ad el, sche dunnas provoche-schan cun sa charsinar e bitschar. Quellus duas èn bainduras qua, lur bitschar è in tric. Per il solit sortan ellas dal local cun in da quels tips che Leo na po betg star ora. Quai èn ils tips gronds e sportivs cun schel en ils chavels, t-shirts stretgs e jeans da marca.

Insatgi dat in stumpel a Leo senza sa perstgisar. La persuna svanescha en direcziun da las tualettas ch'èn davosvart. Mintgant ha Leo cletg e la persuna che stumpla el è ina da las bellas giuvnas — darar ch'ellas fan stim dad el, ma almain po el savurar in mument lur parfum u ch'el senta schizunt per in batterdegl lur corp. Gea, il plaz en il chantun è il meglier lieu per passerar ina sonda saira. Leo guarda adina dad esser

in dals emprims cura ch'il local avra, per che nagin na prendia davent ad el ses plaz. «Hei, ti!

Vuls anc insatge?», dumonda l'um da la bar. Leo squassa il chau e stumpla d'ina vart ses magiel. Il barman al prenda davent e s'occupa lura d'in auter giast. Leo vegn gia dapi onns en quest local, sesa adina sin la medema sutga ed adina è il medem um a la bar, e tuttina na sa quel anc betg ses num. Leo na dat betg en egl, el è qua senza ch'insatgi percorschia.

«Has vis», di David cura ch'el turna da la tualetta, «tes pover schani è puspè qua.» Lena s'enricla ch'ella ha menziunà la davossa giada il giuven che sesa adina en il chantun. David aveva mo ris da sia compassiun ed aveva manegià: «Losers datti dapertut. «Avant pudeva ella almain dar in'egliada a la zuppada, ussa sto'la adina avair tema che David tiria ina faussa conclusiun. Lena ha ina deblezza per persunas «curiusas» – betg ch'ella s'inamurass en tals tips, ma els la paran interessants.

Quel dal chantun — uschia al ha ella numnà — quel l'è dà en egl pir dacurt. El sesa adina sin la medema sutga e contempla la glied. Surtut las bellas giuvnas interessan el, quellus cun ils stiletos e las rassas curtas, quellus che n'al guardassan gnanc or da compassiun. Quel dal chantun n'è betg trid, ma era betg bel. El è ... «Gea, tge è l'atgnamain?», sa dumonda Lena cumpletamain profundada en ses patratgs. Ella volva il chau en direcziun dal chantun. David quinta gist in'anecdota ch'ella enconuscha gia ed el è detg occupà cun sia dramaturgia. Tut la gruppa è plain tensiun. Quel dal chantun guarda gist sin las duas tippas che sa bitschan adina. «Show», pensa Lena surriend. Ella è datiers avunda per vesair l'egliada engurda dal giuven curius. El sesa là sin

la sutga e sias chommas na vegnan gnanc en fin giun plaun. Ses mauns giogan gnervusamain cun ina bavrola rutta. El è sblatg, ha chavels stgirs curts ed ina fatscha ch'ins na vegn betg da tegnair endament. «Enconuschesch jau el sin via, davent da sia sutga en il chantun?», sa dumonda Lena. Ella dubita. El è vestgì sco milli auters; jeans, pullover, chalzers da gimnastica. «E lura ha ditg Lena ...», aha, David arriva plaunsieu a la pointa. Lena sa volva puspè vers sia gruppa e ri ensem cun ils auters, cura che David ha finì ses raquint.

Leo na va mai sin tualetta. Tualettas publicas al paran stgiffusas. Umens davant urinals al disgustan. E lura na lavan els mai ils mauns ... Ma esser datiers da las tualettas ha in grond avantatg. Las giuvnas vegnan per il solit ora ensem, discurrind. Lura auda'l mintgant tge che occupa ellas, tgi che las plascha, tge ch'ellas vegnan anc a far pli tard. Infurmaziuns impurtantas per Leo. Cun quellus emplenescha el las uras suenter la lavur, fin ch'el vegn da sa durmentar. El ha ina buna fantasia e s'imaginescha istorgias entiras a basa da quai ch'el ha udì. Bleras giuvnas, surtut las bellas, han gia survegnì in num dad el. In pèr han era gia gì l'onur d'esser las protagonistas en ses siemis intims. Leo n'ha betg ina preferida. Cum bain che las duas che sa bitschan, quellus al plaschan propi ordvart bain. La brina cun ils ritschs lungs prest anc in pau meglier che la blonda cun ils

chavels curts. Leo guarda sin l'ura: las duas ed in quart. Plaunsieu vegn il local a sa svidar. Il davos restan adina mo ils medems sturns e dus, trais pèrins che sa charsinan en las pultrunas – e Leo.

Ina gruppa da giuvens stat si e tira en las giaccas. In um cun chau ritschà cloma la camariera e paja per tuts. «Probablamain

students», pensa Leo. Ina da las giuvnas emblida ses schal sin la sutga. Leo spera ch'ella giasenza percorscher — lura pudes el al prender zuppadamain cun el. Dunna savuran uschè terriblamain bain ... Leo fixescha il schal. L'um cun ils ritschs tegna avert la porta e tut la gruppa sorta discurrind e riend. Era la giuvna dal schal — senza schal. Quel è anc adina sin la pultruna. Leo spetga anc fin che la camariera ha purtà davent ils magiels. Lura va'l, cun ils mauns en giaglioffa, be plaun vers la pultruna cun il schal. L'aria frestga fa bain. Lena respira profundamain. Il fim la fa adina fadia – ils eglis cumenzan ad arder, ella survegn mal il chau e sto tusser. David ha tschiffà ella enturn la vita e ses ritschs fan sguzias cura ch'el la dat in bitsch. Lena ri. Ella serra il zip da sia giacca. Il culiez para uschè niv. «David, mes schal ...» David dat in clom ch'il rest da la gruppa duaja spegtar. Entant curra Lena enavos en il local. Ella entra en la fimera. Sur la pultruna nua ch'ella seseva sa sgoba insatgi e prenda en maun ses schal cotschen. El al prenda en domadus mauns e sfundra viaden cun ses nas. Cura ch'el sa volva, guarda Lena precis en ils eglis da Leo. Lez para sco petrifigà. Lena surri. Leo sa volva immediat e turna en ses chantun. Il schal ha'l ferm enta maun. Lena sa volva e sorta dal local. Sia gruppa ha entant cumenzà a chantar. A la dumonda da David tge ch'i saja cun il schal, respunda Lena auzond las spatlas: «Insatgi vegn ad avair prendì el ...» Sonda saira. Lena s'entaupa cun sia gruppa. Cura che David ed ella arrivon en il local èsi gia plain e lur amis èn gist vi d'ina runda Tequila. Lena sa erstgisa per ir en tualetta. Cura ch'ella passa la bar, sesa in um da var quarant'onns en il chantun, davant el stat ina biera e la sigaretta fima en il tschender.